

**«ՀԱՐՀԻՄԹԵԼ» սահմանափակ պատասխանատվությամբ  
ընկերության կողմից համարների զբաղեցման**

**Պայմանները**

**( տրված Հայաստանի Հանրապետության հանրային ծառայությունները  
կարգավորող հանձնաժողովի  
2008թ. փետրվարի 15-ի №64Ա որոշմամբ)**

**1. Թույլտվությունում օգտագործված հիմնական հասկացությունները**

1. Սույն թույլտվությունում օգտագործված հիմնական հասկացությունները սահմանվում են հետևյալ կերպ՝

- 1) Հանձնաժողով՝ Հայաստանի Հանրապետության հանրային ծառայությունները կարգավորող հանձնաժողովը.
- 2) Թույլտվություն ունեցող անձ՝ «ՀԱՐՀԻՄԹԵԼ» սահմանափակ պատասխանատվությամբ ընկերություն.
- 3) Թույլտվություն՝ Հանձնաժողովի կողմից տրված սույն փաստաթուղթը, որը հավաստում է թույլտվություն ունեցող անձի՝ համարներ զբաղեցնելու իրավունքը և պարտականությունը.
- 4) Ելքային միջազգային ձայնային ծառայություն՝ ելքային միջազգային ձայնային ծառայության մատուցում, անկախ դրա հիմքում ընկած տեխնոլոգիայից (ներառյալ՝ ինտերնետային արձանագրությունը) և անկախ ցանցային ուղացումներից, որի համար ամբողջովին կամ մասամբ օգտագործվում է հանրային էլեկտրոնային հաղորդակցության ցանցը.
- 5) Հաճախորդ՝ ցանկացած անձ, որն օգտվում է ելքային միջազգային ձայնային ծառայություններից կամ դիմում է դրանց օգտագործման համար: Սույն հասկացությունը չի տարածվում այն անձանց վրա, որոնք առաջարկում կամ մատուցում են հեռահաղորդակցության ծառայություններ.
- 6) Ֆորս մաժոր՝ արտակարգ և անկանխելի դեպքեր և հանգամանքներ, որոնք ստեղծվել են թույլտվություն ունեցող անձի կամքից անկախ, ներառյալ

(սակայն չսահմանափակվելով դրանցով) բնական աղետները, բնության ուժերի արտասովոր ուժեղ դրսևորումները, ինչպես, օրինակ, ջրհեղեղները, երկրաշարժերը, փոթորիկները, պտտահողմերը, նաև սաբոտաժային գործողություններ, ահաբեկչություններ, պատերազմներ, ապստամբություններ, հասարակական անկարգություններ, գործադուլներ, որոնք խոչընդոտում են թույլտվություն ունեցող անձի գործունեությունը կամ հանգեցնում նրա ստանձնած ցանկացած պարտավորության կատարման ձգձգման կամ դադարեցման՝ հակառակ նրա կողմից գործադրված ջանքերի՝ խուսափելու, թուլացնելու կամ վերացնելու այդ ուժերի ազդեցությունը:

## **2. Թույլտվության գործողության ժամկետը**

2. Թույլտվությունն ուժի մեջ է մտնում 2008 թվականի փետրվարի 15-ից:
3. Թույլտվությունն ուժի մեջ է մինչև 2028 թվականի փետրվարի 15-ը:

## **3. Թույլտվություն ունեցող անձի գործունեության վայրը**

4. Թույլտվություն ունեցող անձի գործունեության տարածքն է քաղաք Երևան, Նոր Նորք, 5-րդ մ/շ, 44 շ., բն. 49:

## **4. Թույլտվություն ունեցող անձի գործունեության էությունը կազմող գործառույթները**

5. Թույլտվությունն ուժի մեջ մտնելու պահից թույլտվություն ունեցող անձին իրավունք է տրվում և պարտավորեցվում է քաղաք Երևան, Նոր Նորք, 5-րդ մ/շ, 44 շ., բն. 49 հասցեում արդյունավետ օգտագործել 678300, 678301, 678302, 678303, 678304, 678305, 678306, 678307, 678308, 678309, 800 02006, 800 02007 համարները՝ էլքային միջազգային ձայնային ծառայություններ մատուցելու համար:

## **5. Թույլտվություն ունեցող անձի գործունեության պայմանները**

6. Թույլտվություն ունեցող անձի գործունեությունը պետք է համապատասխանի «Էլեկտրոնային հաղորդակցության մասին» Հայաստանի Հանրապետության օրենքի, այլ օրենքների, Թույլտվության, Հանձնաժողովի կողմից ընդունված և այլ իրավական ակտերի պահանջներին:
7. Թույլտվությունը չի կարող այլ անձանց օգտագործման տրվել, օտարվել կամ գրավադրվել բացառությամբ օրենքով նախատեսված դեպքերի:

8. Թույլտվության գործողությունը չի տարածվում թույլտվություն ունեցող անձի հետ համատեղ, այդ թվում՝ համատեղ գործունեության պայմանագրով գործունեություն իրականացնող այլ անձանց, ինչպես նաև թույլտվություն ունեցող անձի մասնակցությամբ հիմնադրված կամ գործող իրավաբանական անձանց վրա:

9. Թույլտվություն ունեցող անձը պարտավոր է Հայաստանի Հանրապետության օրենսդրությանը համապատասխան ապահովել իր կողմից շահագործվող սարքավորումների հուսալիությունն ու անվտանգությունը:

10. Թույլտվություն ունեցող անձի՝ Հանձնաժողով ներկայացրած տեղեկատվությունը հրապարակային է, եթե այն Թույլտվություն ունեցող անձի կողմից չի համարվում գաղտնի և նշված չէ որպես «գաղտնապահական տեղեկատվություն»: Հանձնաժողովն իրավասու է ընդունել կամ մերժել նման տեղեկատվության չհրապարակման վերաբերյալ Թույլտվություն ունեցող անձի խնդրանքը:

11. Թույլտվություն ունեցող և հաճախորդների կամ վերջնական օգտագործողների փոխհարաբերությունները կարգավորվում են Հայաստանի Հանրապետության օրենքներով, Հանձնաժողովի ընդունած և այլ իրավական ակտերով:

12. Թույլտվություն ունեցող անձն իր գործունեությունն իրականացնելիս, պարտավոր է իր տնօրինության կամ տիրապետման տակ գտնվող սարքավորումների շահագործման, տեխնիկական սպասարկման և նորոգման ընթացքում ապահովել մարդկանց, սպասարկող անձնակազմի կյանքի և առողջության, շրջակա միջավայրի անվտանգությունը:

13. Թույլտվություն ունեցող անձը պարտավոր է իր վերակազմակերպման կամ անվանափոխման, կամ գտնվելու վայրի փոփոխման դեպքում այդ փոփոխությունների իրավական ուժ ստանալու օրվանից սկսած 15-օրյա ժամկետում այդ մասին տեղեկացնել Հանձնաժողովին՝ կցելով նշված տեղեկությունները հավաստող համապատասխան փաստաթղթերը:

14. Թույլտվություն ունեցող անձը պարտավոր է ազգային անվտանգության մարմինների պահանջով իր ապարատային միջոցների կազմում ընդգրկել լրացուցիչ սարքավորումներ և ծրագրային միջոցներ, ինչպես նաև անհրաժեշտ պայմաններ ստեղծել ազգային անվտանգության մարմինների կողմից օպերատիվ-տեխնիկական միջոցառումներ անցկացնելու համար:

15. Թույլտվություն ունեցող անձը պարտավոր է օրենքով նախատեսված դեպքերում և կարգով ապահովել իրավապահ և ազգային անվտանգության մարմինների աշխատակիցների անարգել մոտեցումը հաղորդակցության սարքավորումներին, ենթակառուցվածքներին, միացնող-անջատող, ուղղորդող և նմանատիպ այլ սարքերին, ներառյալ՝ գաղտնալուսումների իրականացման համար անհրաժեշտ սարքերին:

16. Թույլտվություն ունեցող անձը պարտավոր է հնարավորինս սեղմ ժամկետում Հանձնաժողով հայտնել այն հանգամանքների մասին, որոնք հանգեցրել կամ կարող են հանգեցնել թույլտվության պայմանների խախտման:

17. Համարի զբաղեցման թույլտվություն ունեցող անձն իրավասու է այդ համարը տրամադրել սպառողներին, սակայն իրավունք չունի այդ համարը փոխանցել այլ օպերատորների կամ ծառայություններ մատուցողների:

18. Եթե Թույլտվություն ստանալուց հետո առաջին տարվա ավարտին օգտագործվում է հատկացված համարային շարքի 60%-ից պակաս, ապա օգտագործումը համարվում է ոչ արդյունավետ և Հանձնաժողովը կարող է տրամադրված համարային շարքից հետ վերցնել չօգտագործված համարները: Հատկացված համարների ոչ արդյունավետ օգտագործման դեպքում Հանձնաժողովը կարող է հեռախոսային ծառայություններ մատուցող անձին տրամադրված շարքից հետ վերցնել չօգտագործված համարները:

19. Համարները պետք է օգտագործվեն միայն էլքային միջազգային ձայնային ծառայությունների մատուցման նպատակով համարների զբաղեցման թույլտվությունում ամրագրված գործունեության վայրում:

20. Արգելվում է էլքային միջազգային ձայնային ծառայությունները մատուցել համարների զբաղեցման թույլտվության մեջ չնշված համարով:

## **6. Գործունեության վերահսկում**

21. Թույլտվության պայմանների պահպանման վերահսկումն իրականացնում է Հանձնաժողովը:

22. Թույլտվության պայմանների պահպանման վերահսկումն ապահովելու նպատակով Հանձնաժողովը կամ նրա լիազոր ներկայացուցիչներն իրավունք ունեն ազատ մուտք գործել Թույլտվություն ունեցող անձի տարածք: Վերահսկումն իրականացնելու ընթացքում Թույլտվություն ունեցող անձը պարտավոր է լիովին

համագործակցել և աջակցել Հանձնաժողովին կամ նրա լիազոր ներկայացուցիչներին:

23. Հանձնաժողովն անհրաժեշտության դեպքում իր ներկայացուցիչների միջոցով, իր կողմից սահմանված կարգով և ժամկետներում, իրավունք ունի իրականացնելու թույլտվության պայմանների պահպանման ուսումնասիրություն:

#### **7. Պատժամիջոցներ**

24. «Էլեկտրոնային հաղորդակցության մասին» Հայաստանի Հանրապետության օրենքների, Հանձնաժողովի ընդունած իրավական ակտերի պահանջները կամ Թույլտվության պայմանները չկատարելու, ոչ պատշաճ կատարելու կամ խախտելու դեպքում, Հանձնաժողովն իրավասու է կիրառել պատժամիջոցներ:

25. Թույլտվություն ունեցող անձը չի ենթարկվում պատասխանատվության, եթե նրա գործունեության մեջ արձանագրված խախտումները Ֆոբս մաժորի հետևանք են:

#### **8. Թույլտվության դրույթների և պայմանների փոփոխություն**

26. Թույլտվության պայմաններում փոփոխություններ կարող են կատարվել Հանձնաժողովի կամ Թույլտվություն ունեցող անձի նախաձեռնությամբ՝ Հանձնաժողովի կողմից սահմանված կարգով:

27. Հանձնաժողովի նախաձեռնությամբ թույլտվության պայմաններում փոփոխությունները կատարվում են Թույլտվություն ունեցող անձի համաձայնությամբ, բացառությամբ այն դեպքերի, երբ նախատեսվող փոփոխություններն անհրաժեշտ են Հայաստանի Հանրապետության օրենքների և այլ իրավական ակտերի պատշաճ կատարումն ապահովելու համար:

28. Թույլտվության կորստի (կորցնելու, ոչնչանալու և այլն) դեպքում կրկնօրինակի տրամադրման կամ գործողության ժամկետի երկարաձգման անհրաժեշտության դեպքում Թույլտվություն ունեցող անձը պարտավոր է այդ մասին հայտ (դիմում) ներկայացնել Հանձնաժողով՝ վերջինիս կողմից սահմանված կարգով:

#### **9. Ծանուցում**

29. Թույլտվության վերաբերյալ պաշտոնական բոլոր ծանուցումները, հայտերը, պահանջները կամ այլ հաղորդագրությունները Թույլտվություն ունեցող անձի կողմից պետք է ներկայացվեն գրավոր և ուղարկվեն սուրհանդակի միջոցով, պատվիրված նամակով կամ առձեռն հանձնվեն Հանձնաժողով:»: